

समे – 12:25 hrs.

<><><><><><>

Prez/PM-Navy-Day

अज्ज नौसेना दिवस मनाया जा'रदा ऐ। भारतीय नौसेना दी भूमिका ते उपलब्धियें गी मान्यता देने आस्तै हर बरे 4 दिसंबर गी एह दिवस मनाया जंदा ऐ। बरे 1971 च अज्जै दे दिन आपरेशन ट्राइडेंट दौरान भारतीय नौसेना नै PNS खैबर सने पाकिस्तान दे 4 पोत डोब्बी दिते हे। इस अभियान च सैकड़ां बद्दे पाकिस्तानी नौसेना कर्मी मारे गए हे। राष्ट्रपति द्रौपदी मुर्मू होर अज्ज दपैहरी ओडिशा दे पुरी च ब्लू फ्लैग बीच पर नौसेना दिवस समारोह च मुख परौहने दे तौरा पर शिरकत करडन। प्रधानमंत्री नरेंद्र मोदी होरें अज्ज नौसेना दिवस दे मौके पर सभ्भनें जवानें गी बधाई दिती ऐ। रक्षा मंत्री राजनाथ सिंह होरें बी इस मौके नौसेना दे सभ्भनें कर्मिएं गी ममारकबाद दिंदे होई आखेआ जे नौसेना राष्ट्र दी सुरक्षा दा इक महत्वपूर्ण थम्म ऐ।

<><><><><><>

Parliament

संसद दे दौनें सदनें च कार्रवाई अज्ज रमानदारी ते बवस्था आहले ढंग्गै सिर चलै करदी ऐ। प्रश्नकाल दौरान अज्ज लोकसभा च इक सवालै दा परता दिंदे होई रेल मंत्री अश्विनी वैशणव होरें आखेआ जे रेल गड्डिएं दी सुरक्षा सरबन्धी आटोमैटिक सिस्टम “कवच” तैयार करने दा कम्म मुकम्मल करी लैता गेआ ऐ। इक होर सोआल दे परते च उनें आखेआ जे रेलवे दा

लक्ष्य हर यात्रिएं गी रिआयत देना ऐ ते सब्बै यात्री केंद्र आसेआ उपलब्ध कराई जाने आहली
सब्सिडी दे दायरे च ओंदे न।

<><><><><><>

LG-Security Review

उपराज्यपाल मनोज सिन्हा होरें पुलस अधिकारिएं गी निर्देश दिता ऐ जे ओह जम्मू-कश्मीर च
सुरक्षा ते कनून बवस्था सरबन्धी चुनौतिएं कन्नै पूरी तगड़ेयाई ते असरदार ढंगे नै निब्वड़डन।
कल राजभवन च गृह विभाग दे कम्मकार दा जायजा लैने लेई सद्दी गेदी इक उच्ची सतह दी
बैठक च उनें एह गल्ल आकखी। बैठका च मुख सचिव अटल डुल्लू, गृह विभाग दे प्रधान
सचिव चंद्राकर भारती, पुलस महानिदेशक नलिन प्रभात ते डी.जी.पी ते ए.डी.जी.पी रैंक दे होर
दुए अधिकारी बी बैठका च मजूद हे। बैठका दौरान एल.जी होरें गी सुरक्षा सरबन्धी अखराजात
अमले दी तैनाती, ढांचागत कम्म ते होर दुए महत्वपूर्ण विषयें बारै तफसीली जानकारी दिती
जिंदे च जम्मू-कश्मीर पुलस, जेल, होम गार्ड, अग्ग ते इमरजेंसी सेवा, एस.डी.आर.एफ
फोरेंसिक साइंस ते गृह विभाग ते एहदे मतैहत होर दुए विभाग शामिल न। मनेज सिन्हा होरें
कनून बवस्था ते सुरक्षा सरबन्धी चुनौतिएं दा मकाबला करने लेई इनें सब्बनें संगठनें दे पूरी
चाल्ली आधुनिकीकरण पर जोर भरेआ। उनें SRE ते PMDP तैहत सब्बनें परियोजनाएं गी
मित्थे गेदे समें दे अंदर-अंदर मुकम्मल करने दा निर्देश दिता।

<><><><><><>

CM-GAD Meet

मुख्यमंत्री उमर अब्दुल्ला होंरें परतिए मलाजमत देने, एक्सटेंशन देने, अटैच करने ते बाद्दू चार्ज दिते जाने पर रोक लाने दा निर्देश दिता ऐ। कल आम प्रशासनिक विभाग दी कारकरदगी दी समीक्षा करदे होई उनें एह गल्ल आकखी। इस दौरान उमर अब्दुल्ला होंरें जम्मू-कश्मीर लोक सेवा आयोग, जम्मू-कश्मीर सर्विस सलैक्शन बोर्ड दिएं प्रमोशनं, काडर प्रबंधन, सिखलाई, तबादले ते होंरें प्रशासनिक मामलें सरबन्धी बक्ख-बक्ख पैहलुएं पर सोच-विचार ते तफसीली जानकारी हासल कीती। उनें सेहत ते मेडिकल शिक्षा ते शिक्षा विभाग च मलाजमें दी अटैचमेंट दी चेचे तौरा पर जांच ते जायजा करने दा निर्देश दिता। उनें कश्मीरी विस्थापितें लेई पी.एम पैकेज तैहत लाए गेदे मलाजमें दी स्थिति ते उंदी कारकरदगी दे बारै च बी जानकारी हासल कीती। एहदे अलावा एसआरओ-43 ते 2022 बरें आहली जम्मू-कश्मीर पुनर्वास स्कीम दे कन्नोकन्नी I.A.S ते J&KAS सरबन्धी मामलें दी बी समीक्षा कीती।

<><><><><><>

ISRO-PROBA-3 Launch

भारती अंतरिक्ष अनुसंधान संगठन - इसरो अज्ज यूरोपी अंतरिक्ष एजेंसी दे प्रोबा-3 उपग्रैह गी कक्षा च लेई जाने आहले प्रक्षेपण यान पीएसएलवी-सी59 दा प्रक्षेपण करोग। श्रीहरिकोटा दे सतीश धवन अंतरिक्ष केन्द्र थमां एह प्रक्षेपण संझां 4 बज्जियै 8एं मिंटें पर होग। इसरो दी बवसायिक शाख - न्यू स्पेस लिमिटेड गी यूरोपी अंतरिक्ष एजेंसी थमां एह ऑर्डर मिलेआ हा। प्रोबा-3 अंतरिक्ष दी तय कक्षा च पुज्जने परैन्त एह द'ऊं उपग्रैह च बंडोई जाहग। एह उपग्रैह सूरज दे प्रभा-मंडल, एहदे आले-दोआले दे वातावरण, अंतरिक्ष दे मौसम ते सौर ब्हाऊ दा शोध करडन।

<><><><><><>

RNU Raising Day

आकाशवाणी दा क्षेत्रीय समाचार एकांश जम्मू औंदी 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश केई सारे कार्यक्रमें दा आयोजन करै करदा ऐ। स्थापना दिवस आले रोज 6 दिसम्बर गी बड्डलै साइडे 9 बजे, 30एं मिंटें दा इक विशेष कार्यक्रम प्रसारत कीता जाहग जेहदे च क्षेत्रीय समाचार एकांश दी भूमका, जिम्मेवारिएं ते कम्म करने दे तौर-तरीकें दे अलावा, इत्थे कम्म करी चुके दे अधिकारिएं कन्नै गल्लबात बी शामिल होग। एहदे अलावा संझा 7 बजे बी 15 मिंटें दा इक विशेष कार्यक्रम प्रसारत कीता जाग जेड़ा इस मौके पर स्हाड़े श्रोताएं ते जम्मू-कश्मीर दिएं नामवर हस्तिएं आसेआ भेजी जा'रदिएं शुभ कामनाएं पर आधारित होडन।

अपने कर्मिएं दी हौसला-अफज़ाई लेई, ऐकती स्थापना दिवस दे मौके पर उनें'गी सम्मानित बी कीता जाहग जिंदे च 2024 ब'रे दे बेहतरीन समाचार सम्पादक, डोगरी ते गोजरी दे बेहतरीन समाचार वाचक ते अनुवादक, बेहतरीन जिला संवाददाता ते जनरल स्टाफ श्रेणी च बेहतरीन कर्मी दे सम्मान शामिल न। इस मौके पर 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैहयोग ते जोगदान देने आहलें गी बी सम्मानित कीता जाहग।

<><><><><><>

JK-Soft Tennis Championship

जम्मू-कश्मीर खेड कौंसल औंदी जूनियर नेशनल साफ्ट टेनिस प्रतियोगिता 2024-25 गिते खडारिएं दी ताल लेई ओपन ट्रायल्स दा सरिस्ता करा रदा ऐ। एह प्रतियोगिता पंजाब च होग। अधिसूचना मूजब डिविजन सतह दे ट्रायल 6 दिसंबर गी श्रीनगर दे राजबाग आहले स्टेडियम च कश्मीर खिते दे खडारिएं लेई होंगन ते जम्मू खिते दे खडारिएं लेई ट्रायल 7 दिसंबर गी एम.ए स्टेडियम जम्मू च होंगन। इस्सै चाल्ली प्रदेश सतह दे ट्रायल 9 दिसंबर गी एम.ए स्टेडियम जम्मू च होंगन। एह ट्रायल देने दी इच्छेया रखने आलें खडारियें गी सूचित कीता जंदा ऐ जे ओह दस्सी गेदियें तरीकें पर अपना जनम प्रमाण पत्र जानि डेट ऑफ बर्थ सर्टिफिकेट दी असल कॉपी लेइए ताल आहिलियें थाहरें पर समेंसिर पुज्जी जान। इस बारै होर मती जानकारी लेई जम्मू-कश्मीर खेड काउंसल च खेलो इंडिया साफ्ट टेनिस दे मेन्टोर इंदू भूषण हुंदे नै 7780962714 नंबर पर सम्पर्क करी सकदे न।

<><><><><><>